

nieres Instructions, les remercia de toutes les charites qu'ils auoient exercés en son endroit pendant tout le voyage, leur demanda pardon des peines qu'il leur auoit données, les chargea de demander pardon aussi de sa part a tous nos peres et freres qui sont dans le païs des outaouïacs, et voulut bien les disposer a recevoir le sacrement de penitence, qu'il leur aministra po⁹ la derniere fois; il leur donna aussi vn papier dans lequel il auoit escrit toutes ses fautes depuis sa derniere Confession po⁹ le mettre entre les mains du p. sup^r. a fin de l'obliger a prier Dieu po⁹ luy plus particulièrement En fin il leur promit qu'il ne les oublieroit point dans le paradis, et coe il estoit fort Compassif sachant qu'ils estoient bien las par les fatigues des Jours precedents, il leur ordonna d'aller prendre vn peu de repos, les assurant que son heure n'estoit pas encore si proche, qu'il les esueilleroit quand il en seroit temps; coe de fait 2 ou 3 heures apres il les apella estant tout prest d'entrer dans l'agonie.

quand ils furent aprochés il les embrassa encore vne fois pendant qu'ils fondoient en larmes a ses pieds; puis il leur demanda de l'eau benite et son reliquaire, et ayant luy mesme osté son Crucifix qu'il portoit tousjours pendu a son col, il le mit entre les mains d'un de ses Compagnons le priant de le tenir tousjours vis a vis de luy eleué deuant ses yeux et sentant qu'il ne luy restoit que fort peu de temps a viure, il fit vn dernier effort Joigner les mains, et tenant tousjours les yeux. doucement attachés a son Crucifix, il fit a haute voix sa profession de foy, et remercia la diuine majesté de la grande grace qu'il luy faisoit de mourir dans la Comp^e. d'y mourir